

第八節 福岡町治水

⑧ 福岡町治水碑（玉川用水碑）（所在地 岡崎市福岡町荒追）



福岡町治水碑

農業之憂莫大乎不得灌溉之利與疏水之方矣若夫土壤豐沃能適穀菜而灌溉不得其道則方盛夏炎熱燬地也天不雨者數十日田園龜裂菜禾幾枯死而無術可施春來耕耘遂屬徒勞矣疏水不得其方則方秋潦猝至也破堤浸田氾濫于平地者連日作物悉歸腐朽矣我福岡町地形秀美豐穰稱無雙而旱災水害所以兩不能免者一由恃天然之地味而不講豫防災患之道耳故本縣土木課長黒川治愿君大憂之苦心慘憺數踏查實地遂劃改浚洲川及稻熊川增築堤防於廣田川柳川施設砂防工事於洲川水源且新設用水路於數所之策而工費實要巨財人民頗苦其負擔荏苒不決數月成否將不測焉而君深謀遠慮徐定百年之大計詳示其方法規畫論之民大悟衆論始定於是以前明治十六年三月起土工日夜督勵不暮年而成工矣爾來旱災水患全絕其跡頻年穀菜每稔農桑之業勃然而興焉嗟乎使本町有今日之繁榮者果誰之力也宜乎每遭大旱霖雨追慕君之遺功而不已也今也舉町相謀欲刻諸碑以傳不朽徵文余余固拙于文辭然亦常與町民同感者乃不敢辭略記其顛末云爾

皆明治三十有四年八月

三宅道孝撰

早川芳信書